

դեպի խրամատը: Պարիսպների մեջ բացված են հրացանաձգության համար աշքեր:

Այս պարսպապատ տարածությունից դուրս արևելյան կողմում պահպանվել է մի թաղակապ պարզ բողիղիկաձև եկեղեցի, տեղացիների ասելով՝ կուսանոց: Պարիսպների ներքին շենքերը զբաղեցնում են միայն տարածության հարավ-արևմտյան բաժինը: Մնացած հատվածներում նշմարվում են պատերի առանձին հետքեր: Տեղացիք պատմում են, որ աշտարակի մոտ մինչև վերջին ժամանակներս պարզ երևում էին ջրի ավազանի կողերը. սրանք այժմ թաղված են հաստ հողի շերտի տակ: Շենքերի կենտրոնը զրավում է մելիքական տնային եկեղեցին. դա մի թաղակապ պարզ բողիղիկա է երկու խորաններով: Լույսը ընկնում էր առաստաղի մեջ թողած կտր բացվածքից, որին այսօր էլ հաճախակի պատահում ենք գավառի գյուղերում կառուցված եկեղեցիներում և ավելի հարավ՝ նաև Մեղրու շրջանում: Մելիքական եկեղեցու այս յերթիկը անձրևից պաշտպանելու համար նրա բացվածքը պահված է եղել սյուների վրա հենված գմբեթով: Վերջին (1931 թ.) երկրաշարժից այդ գմբեթը տապալվել է. այժմ նրա բեկորները թափված են շենքի ներսում: Արևմտյան կողմում եկեղեցին ունեցել է փայտե տախտակամած պատշգամբ, ինչպես երկվում է պատշգամբը պահող գերանների զխների համար պատերի մեջ թողած ծակերից: Խորանի՝ աբսիդի պատերի վրայից անձրևն ու ժամանակը դեռ չեն սրբել որմնակարհերի՝ ֆրեսկոների պարզորոշ մնացորդները՝ սրբերի նկարներ, վեղարավոր կերպարանքներ: Այդ որմնանկարների վրա ամեն մի այցելու իր պարտքն է համարել թողնել իր այցելության մասին հիշատակ և հավերժացրել է իր ազգանունը ածուխով, ներկով կամ փորագրություններով: Տեղացիք վկայում էին, որ դեռ հինգ-վեց տարի առաջ գրեթե բոլոր պատերին սվաղի վրա շատ լավ են պահպանված եղել բազմաթիվ նկարներ: Եկեղեցին ունի երկու դուռ: Հյուսիսայինը տանում է ժայռի մեջ փորած թաղակապ փողան (անցք, կորիզոր), որից դեպի ձախ մի դռնակով մտնում ես հյուսիսից հարավ ձգվող թաղակապ զետեղարան: Դա գուցե եղել է մի մատուռ, թեև շունի պատարադի սեղանի ոչ մի նշան, կամ՝ որ ավելի հավանական է, եկեղեցական պահեստ, իսկ դեպի աջ մտնում ես ամբողջ շենքի ճակատի երկարությամբ ձգվող մի ցածրիկ նախազավիթ, որը կազմված է երկու թաղակապ դուգահեռ սրահներից: Սրանցից ետևինը ավելի երկար է, քան թե ճակատի կողմինը: Վերջինիս կցված է երկու սրահների երկարությունների տարբերությանը համապատասխան լայնություն ունեցող անկյունը լրացնող մի երրորդ սրահ, որի թաղը ձգված է հակառակ ուղղությամբ՝ արևելքից արևմուտք: Երկու սրահաշարքերը բաժանող պատի մեջ թողված են լայն կամարակապ բացվածքներ՝ իրարից հեռու սյունանման որմնամասերով բաժանված: Այսպիսով գոյացող երեք բացվածքներից երկուսը տանում են ետևի սրահից դեպի առջևինը, իսկ երրորդը՝ դեպի անկյունի սրահը, ուր մի փոքրիկ դռնակով կարելի է մտնել նաև առջևի սրահից: Առջևի սրահի՝ շենքի ճակատի ուղղությամբ ձգվող պատի մեջ թողված է մի լայն բացվածք, որը նայում է դեպի արևելք: Դա պիտի եղած լինի դրսից դեպի փողանը տանող մի ընդհանուր մուտք, ուր բարձրանալիս են եղել բակից մի քանի աստիճաններով, որոնք սակայն չեն պահպանվել: Սրահները թողնում են նախազավթի տպավորություն: